



Nuuk 13. januar 2015

Inatsisartut suleriaasianni §37 naapertorlugu Naalakkersuisunut imatut apeqquteqarpunga:

**1.**

**Naalakkersuisut isumaqarpat Aatsitassat pillugit Inatsimmi §4, Imm. 3 naapertorlugu aalajangiisoqarsimasoq, decemberip 21-anni London Mining A/S-ip pigineqarnerata allannguutaa akuerineqarmat? Akissut tunngavilersoq-quneqarpq.**

**2.**

**Naalakkersuisut isumaqarpat piginnittuunerup allanngornera pillugu paasisuttissat Inatsisartunut apuunneqarnissaat pisariaqartoq?**

**3.**

**Naalakkersuisut isumaat naapertorlugu pissutsit suut Aatsitassat pillugit Inatsisip § 4, Imm. 3-anni pineqarpat? Naalakkersuisut isumaat naapertorlugu pissutsit qanoq ittut pillugit aalajangiisoqartinnagu Inatsisartut ilisimatineqartarnissaat pillugu assersuusiortoqarnissaa kissaatigineqarpoq.**

(Inatsisartunut ilaasortaq Naaja H. Nathanielsen, Inuit Ataqatigiit)

### **Tunngavilersuutit**

Isukasiani saviminissamik paaavimmik pilersitsisoqassappat tamanna inuiaqatigiinnut avatangiisinullu annertuumik sunniuteqassaaq. Pilersaarut innuttaaqatigiit qanoq amerlatiginerannut inuiaqatigiinnilu aningaasarsiornermut naleqqiullugu annertoorujussuuvoq. Qaammaterpalussuit kingullit ingerlaneranni suliniutigineqartup siunissaa assut nalornisutaasimavoq London Mining A/S-ip piginnittuisa aningaasarsiornikkut imaannaanngitsunik ajornartorsiuteqarnerat pissutigalugu. Tamannali sioqqullugu aningaasaliissusarsiorneq aamma ajornakusoorsimavoq – aatsitassarsiornermi ataatsimut isigalugu ajornartorsiortoqarnera pissutigalugu.

Januarip 8-aanni Naalakkersuisut tusagassioprfitsigut nalunaaruteqarput "London Mining Greenland A/S-imut tunuliaqusiisussat nutaat"-mik qulequtsikkamik. Nalunaarummi atuarneqarsinnaavoq Naalakkersuisut decemberip 21-anni London Mining A/S-ip ingerlatseqatigiifimmit General Nice Development Limited-imit pigineqalersimanera akuerisimagaat.

Januarip 8-anni tusagassiorfitsigut nalunaarummi Naalakkersuisut piginnittunngortut nutaat ilisaritippaat tamatumalu inuiaqatigiinnut qanoq isumaqarnera ilisimasitsis-sutigineqarluni. Aamma saviminissamik paaavissamik Isukasiani pilersitsiniarnerup suliniutip qanoq ingerlanneqarnera ilisimasitsissutigineqarpoq.

Eqqumiigaara Naalakkersuisut avammut nalunaaruteqannginnerminni Inatsisartut Aatsitassanut Ataatsimiititaliaannik ilisimatitsinnissaq pisariaqartutut isigisimangim-massuk. Inatsisit atuuttut naapertorlugit taamaaliortoqarsimasariaqaraluartoq isuma-qarpunga. Inatsisilerinerli pineqaraangat assigiinngitsunik paasinnittoqarsinnaasarpoq. Taamaattumik Naalakkersuisut Aatsitassanut Inatsimmi § 4, Imm. 3, Naalakkersuisut Inatsisartunut ilisimatitsinissamik pisussaaffeqarnerannut tunngasoq, Naalakkersuisut qanoq paasinerat tusassallugu soqutigaa.

*§ 4, Imm. 3*

*Sammisanik aalajangiussisoqartinnagu inuiaqatigiinnut imaluunniit avatangiisinut pingaarutilimmik sunniuteqarsinnaasut pissutsit pillugit sammisanik Inatsisartut ataanni ataatsimiititaliamut pingaarutilimmut Naalakkersuisut ilisimatitsissapput.*